

南
北
史
合
注

欽定四庫全書

南北史拾注卷八十九

明 李清 撰

北史三

元年八月戊申生平城紫宮神光照室天地氤氳和氣
充塞高祖潔白有異姿襁褓岐嶷長而宏裕仁孝綽然
有人君之表獻文尤愛異之三年六月辛未立為皇太

子五年受禪延興元年秋八月丙午皇帝即位于太華
前殿改皇興五年為延興丁未宋人來聘九月壬戌詔
在位及民庶進直言壬午青州高陽人封辨聚黨自號
齊王州軍討平之冬十月丁亥沃野統萬二鎮勅勒板
詔太尉隴西王源賀追擊之枹罕滅之徙其遺迸于冀
定相三州為營戶十二月乙酉封駙馬都尉穆亮為趙
郡王壬辰詔求舜後獲東萊人媯苟之後其家畢世以
彰盛德之不朽復前濮陽王孔佳本封辛丑徙趙郡王

穆亮為長樂王癸丑日有蝕之

魏書靈徵志載是月徐州壬士邢德於彭城南一百二十里得著一株四十九枝下掘得大龜獻之

二年春正月太陽蠻酋桓誕率戶內屬拜正南將軍封襄陽王曲赦京師及河西南至秦涇西至枹罕北至涼州及諸鎮詔假員外散騎常侍邢祐使於宋二月丁巳詔曰頃者淮徐未賓尼父廟隔非所致令祠典寢頓禮章殄滅遂使女巫妖現淫進非禮自今有祭孔廟制用

酒脯而已不聽婦女雜合以祈非望之福犯者以違制
論其公家有事自如常禮柔然犯塞上皇次于北郊詔
諸將討之鹵遁走北部敕勒叛奔柔然上皇追至石磧
不及而還三月上皇至自北討戊辰以散騎常侍駙馬
都尉萬安國為大司馬大將軍封安城王庚午親耕籍
田連州敕勒謀反徙配青徐齊兗四州萬戶夏四月庚
子詔工商雜伎盡聽赴農諸州課人益種菜果辛亥宋
人來聘癸酉詔沙門不得去寺行者以公文

魏書靈徵志載是月詔曰近內外興建福業造立圖
寺然貧富之人費竭財產務存高廣殺昆蟲含生之
類苟能精致累土聚沙福鍾不朽欲建為福之因未
去傷生之業朕為民父母慈養是務一切斷之

是月宋明帝殂五月丁巳詔軍警給璽印傳符次給馬
印六月安州民遭冰雹詔丐租賑恤丙申詔今年貢舉
尤為猥濫自今所遣皆可問盡州郡之高才極鄉閭之
選戊午行幸陰山秋七月壬寅詔州郡縣各遣二人才

堪專對者赴九月講武帝親問風俗八月百濟遣使請
兵伐高麗九月辛巳車駕還宮戊申統萬鎮將河間王
閻武皮坐貪殘賜死己酉詔以州鎮十一水旱丐其田
租開倉賑恤又詔流迸之人皆令還本違者徙邊冬十
月柔然犯塞及五原十一月上皇親討之將度漠柔然
聞之北走數千里丁亥封皇叔畧為廣川王壬辰分遣
使者巡省風俗問民疾苦帝每一月一朝崇光宮十二
月庚戌詔曰頃者以來官以勞升未久而代牧守無恤

人之心競為聚斂送故迎新相属于路非所以固民志
隆治道也自今牧守溫良仁儉克己奉公者可久于其
任歲積有成遷位一級其貪殘非道侵削黎庶者雖在
官甫爾必加黜罰著之於令以為彛準詔以代郡事同
豐沛代人先配成邊者免之是歲高麗地豆干庫莫奚
高昌等國並遣使朝貢

是歲宋泰豫元年

三月春正月庚辰詔員外散騎常侍崔演使于宋丁亥

改崇光宮為寧光宮二月

魏書載二月癸丑詔牧守令長勤率百姓無令失時
同郡內貧富相通家有無牛通借無者若不從令一
門內終身不仕守宰不督察免所居官

戊午上皇至自北討飲至策勲告于宗廟甲戌詔縣令
能靜一縣劫盜者無理二縣即食其祿能靜二縣者三
年遷為郡守二千石能靜二郡上至三郡亦如之三年
遷為刺史三月壬午詔諸倉屯穀麥充積者出賜貧民

夏四月戊申詔假司空上黨王長孫觀等討吐谷渾拾
寅壬子詔以孔子二十八世孫魯郡公以為崇聖大夫
給十戶以供灑掃六月甲子詔曰往年縣召秀才二人
問守宰善惡而賞者未幾罪者衆多肆法傷生情所未
忍諸為人所列者特原其罪朕可代之

魏書靈徵志載延興三年秋秀容郡婦人一產四男
四產十六男

秋七月詔河南六州民戶收絹一匹綿一斤租三十石

欽定四庫全書

乙亥行幸陰山八月帝從上皇幸河西拾寅謝罪請降
許之九月辛巳車駕還宮乙亥宋人來聘己亥詔曰今
京師及天下囚未判在獄致死無近親者給衣衾棺槨
葬之不得暴露辛丑詔遣十使巡行州郡檢括五口冬
十月上皇將南討詔州郡民十丁取一充行戶租五十
石以備軍糧十一月戊寅詔以河南州郡牧守多不奉
法致新邦百姓莫能上達遣使者觀風察獄黜陟幽明
搜揚賑恤癸巳上皇南巡至懷州所過問民疾苦賜高

年孝悌力田布帛十二月癸卯朔日有蝕之庚戌詔關
外苑園聽民樵採是歲州鎮十一水旱丐民田租開倉
賑恤相州民饑死者二千八百四十五人妖人劉舉自
稱天子齊州刺史武昌王平原捕斬之

魏書靈徵志曰是年十二月顯祖因田鷹獲鴛鴦一
其偶悲鳴上下不去帝悵然問左右曰此飛鳴者鴟
乎雄乎對曰陽性剛陰性柔以剛柔推之必雌矣帝
曰雖人鳥事別情性何殊于是禁不得畜鴛鴦

高麗契丹庫莫奚悉萬斤等國並遣使朝貢

是年宋主昱元徽元年

四年春正月癸酉朔日有蝕之丁丑太尉隴西王源賀以病辭位二月甲辰上皇至自南巡辛未禁寒食三月丁亥詔員外散騎常侍許赤武使于宋夏四月丁卯詔自今非謀反大逆干紀外奔罪止其身

魏書載夏六月乙卯詔曰下民凶戾不顧親戚一人為惡殃及合門朕為民父母深為愍悼自今以後非

謀反大逆干紀外奔罪止其身而已今德被殊方同軌將一宥刑寬禁不亦善乎

秋七月己卯曲赦仇池八月戊申大閱于北郊九月以宋亂故詔將軍元蘭等伐蜀漢冬十月庚子宋人來聘十一月分遣侍臣循河南七州觀察風俗撫慰初附是歲州鎮十三大饑丐民田租開倉賑之

冊府元龜載是年以中書覆案上下之法遂罷之獄有大疑乃評議焉先是諸曹奏事多有疑請又口傳

詔敕或致矯擅乃令事無大小皆據寔律正名不得
疑奏合則制可失衷則彈之于是事咸精練羣下莫
敢相同

粟特敕勒吐谷渾高麗曹利濶悉契丹庫莫奚地豆干
等國並遣使朝貢

五年春二月癸丑詔定考課明黜陟夏四月詔禁畜鷹
鷄開相告之制五月丙午詔員外散騎常侍許赤武使
于宋丁未幸武州山辛酉幸車輪山六月庚午禁殺牛

馬壬申曲赦京師死罪遣備柔然秋九月癸卯洛州人
賈伯奴稱恒農王豫州人田智度稱上洛王郡討平之
冬十月上皇大閱于北郊十二月丙寅改封建昌王長
樂為安樂王己丑城陽王長壽薨宋人來聘是歲高麗
吐谷渾龜茲契丹庫莫奚地豆干柔然等國並遣使朝
貢

承明元年春二月司空東郡王陸定國坐事免官爵兵
夏五月冀州人宋伏龍聚眾自稱南平王郡縣捕斬之

六月甲子詔中外戒嚴分京師見兵為三等第一軍出
遣第一兵二等亦如之辛未太上皇帝崩壬申大赦改
元大司馬大將軍安城王萬安國坐法賜死戊寅以征
西大將軍安樂王長樂為太尉尚書左僕射南平公目
辰為司徒進封宜都王以南部尚書李訢為司空尊皇
太后為太皇太后臨朝稱制秋七月甲辰追尊皇妣李
貴人為思皇后濮陽王孔雀有罪賜死八月甲子詔羣
公卿士有使人益國者具狀以聞甲戌以長安二蠶多

死丐民歲賦之半九月丁亥曲赦京師

魏書靈徵志載是月幽州民齊淵家杜樹結實既成一朝盡落花葉復生七日內蔚然如春狀 冊府元龜載是月并州上言木連理相去一丈二尺中有五枝相連

冬十月丁巳起七寶永安行殿乙丑進假東陽王丕爵為王己未詔羣臣卿士下及吏人各聽上書直言及諫使朝有不諱之音野無自蔽之響諸有益政利民可正

金史卷之八十九
風俗者有司以聞辛未幸建明佛寺大宥罪人進濟南
公羅拔為王是歲柔然高麗庫莫奚波斯契丹宕昌悉
萬斤等國並遣使朝貢

太和元年春正月乙酉改元

冊府元龜載詔曰朕夙承寶業元貺俱臻地瑞並應
風和氣婉天人交協實賴神祇七廟降福之助宜因
陽始令協典章其改今號為太和元年

辛亥

魏書載正月辛亥詔曰今牧民者與朕共治天下也
宜簡以徭役先之勸獎相其水陸務盡地利使農夫
外布桑婦內勤輕有徵發致奪民時以侵擅論民有
不從其教惰于農桑者加以罪刑

起太和安昌二殿已有秦州略陽人王元壽聚眾自號
衝天王雲中飢開倉賑恤二月辛未秦益二州刺史武
都公尉落候討破王元壽三月庚子以雍州刺史東陽
王丕為司徒丙午詔曰去年牛疫死傷大半今東作既

興人須肄業其教所在督課田農有牛者加勤于常歲
無牛者倍庸于餘年一夫制田四十畝中男二十畝無
令人有餘力地有遺利夏四月丁卯幸白登山壬申幸
崢山樂安王良薨詔復前東郡王陸定國官爵五月車
駕祈雨于武州山俄澍雨大洽秋七月壬辰京兆王子
推薨庚子定三等死刑己酉起朱明思賢門是月宋人
殺其主昱八月壬子大赦丙子詔曰工商皂隸各有厥
分而有司縱濫或染清流自今戶內有工役者唯止本

部丞已下準次而授若階籍元勛以勞定國者不從此
制戊寅宋人來聘九月乙酉詔羣臣定律令于太華殿
庚子起永樂遊觀殿于北苑穿神泉池冬十月辛亥朔
日有蝕之癸酉宴京邑耆老年七十以上于太華殿賜
以衣服詔七十已上一子不從役宋葭蘆戍主楊文度
遣弟鼠襲陷仇池

魏書靈徵志曰是年十月鄉郡民李飛等詣京南山
採藥遊越谷南領下見清碧石柱數百枚被詔案驗

稱所見清碧柱長者一匹相接而上或一尺二寸或一尺多不可數請付作曹採用時人神異之冊府元龜載冬十月詔曰朕每覽先王之典經論百代儲蓄既積黎民永安爰暨季葉世道凌替富強者并兼山澤貧弱者望絕一廛故地有餘利民無餘財或爭畝畔以亡身或因饑饉以棄業今遣使者循行州郡授以主業為勸課農桑之本

十一月癸未詔討楊鼠丁亥懷州人伊祈苟自稱堯後

應王聚衆于重山洛州刺史馮熙討平之閏月庚午詔
員外散騎常侍李長仁使于宋十二月壬寅征西將軍
皮喜攻陷葭蘆斬楊文度傳首京師丁未州郡八水旱
民饑詔開倉賑恤是歲高麗契丹庫莫奚柔然居多羅
西天竺舍衛曇伏羅粟楊婆員闍等國並遣使朝貢

是歲宋順帝昇明元年

二年春正月丁巳封昌黎王馮熙第二子始興為北平
王二月丁亥行幸代之湯泉所過問民疾苦以宮女賜

欽定四庫全書

南北史合注

卷八十九

十三

貧人無妻者癸卯車駕還宮乙酉晦日有蝕之三月丙子以河南公梁彌機為宕昌王夏四月甲申幸崢山丁亥還宮乙丑宋人來聘京師旱甲辰祈天災于北苑親自禮焉減膳避正殿丙午澍雨大洽曲赦京師五月詔曰迺者人漸奢尚婚葬越軌又皇族貴戚及士庶之家不惟氏族高下與非類婚偶先帝親發明詔為之科禁而百姓習常仍不肅改朕念憲章舊典永為定準犯者以達制論六月庚子皇叔若薨秋

魏書靈徵志載是年七月武川鎮大風吹失六家羊角而上不知所在

八月分遣使者考察守宰問人疾苦丙戌詔罷諸州禽獸之貢九月乙巳朔日有蝕之丙辰曲赦京師冬十月壬辰詔員外散騎常侍鄭羲使于宋十二月癸巳太皇太后殺南郡王李忠是歲州鎮二十餘水旱人饑詔開倉賑恤龜茲國獻名馳龍馬珍寶甚象吐谷渾柔然勿告等國並遣使朝貢

三年春正月癸丑坤德六合殿成庚申詔罷行察官二月辛巳帝太皇太后幸代郡湯泉問民疾苦鰥寡貧者妻以宮女己亥還宮三月癸卯朔日有蝕之甲辰曲赦

京師

冊府元龜載是月齊州獻五色犬其色如畫

夏四月壬申宋人來聘癸未樂良王樂平薨甲寅宋順帝禪位于齊丙申幸崞山己亥還宮庚子進淮陽公尉元爵為王宜都王日辰有罪賜死五月丁巳帝祈雨于

北苑閉陽門是日澍雨大洽辛酉賜國老各衣一襲綿
五斤絹布各五疋六月辛未以雍州民飢開倉賑恤起
文石室靈泉殿于方山秋七月壬寅詔免宮人年老及
病者八月壬申詔羣臣進直言乙亥幸方山起思遠佛
寺丁丑還宮九月壬子以司徒東陽王丕為太尉趙郡
公陳建為司徒進爵魏郡王河南公苟頹為司空進爵
河東王進太原中王猷中山王隴東公張祐新平王乙
未定州刺史安樂王長樂有罪賜死庚申隴西王源賀

薨冬十月己巳朔大赦十一月癸卯賜京師貧窮高年
疾患不能自存衣服布帛各有差癸丑進假梁郡公元
嘉爵為假王督二將出淮陰隴西公元琛三將出廣陵
河東公薛豹子三將出廣固至壽春是歲吐谷渾高麗
柔然地豆干契丹庫莫奚龜茲粟特州逸河龔疊伏羅
員闞悉萬斤等國各遣使朝貢

是歲齊高帝建元元年

四年春正月癸卯乾象六合殿成乙卯廣川王略薨丁

已罷畜鷹鷄之所以其地為報德佛寺戊午襄城王韓
頽有罪削爵徙邊二月癸巳以旱故詔天下祀山川羣
神及能興雲雨者修飾祠堂薦以牲璧民有疾苦所在
存問夏四月乙卯幸廷尉籍坊二獄引見諸囚詔隨輕
重決遣以赴耕耘

魏書載夏四月乙卯詔曰廷尉者天下之平民命之
懸今農時要月百姓肆力之秋而愚民陷罪者甚
宜隨輕重決遣耕耘之業

辛巳幸白登山甲申賜天下貧民一戶內無雜財穀帛者稟一年朔幸火山壬寅還宮六月丁卯以澍雨大洽曲赦京師秋七月辛亥行幸泰山壬子詔會京師耆老賜綿綵衣服几杖稻米蜜麩復家人不徭役閏月丁亥幸獸圈親錄囚徒輕者皆免之壬辰頓丘王李鍾葵有罪賜死八月甲辰幸方山戊申幸武州山石窟寺庚戌還宮乙酉詔諸州置冰室九月乙亥思義殿成壬午東明觀成戊子詔曰隆寒雪降可遣侍臣詣廷尉獄及囚

所察飢寒者給以衣食桎梏者代以輕鎖是歲郡鎮十八水旱民飢詔開倉賑恤柔然悉萬斤等國並遣使朝貢

五年春正月己卯南巡丁亥至中山親見高年問民疾苦二月辛卯朔大赦賜孝悌力田孤貧不能自存者穀帛各有差免宮人老者還其親丁酉至信都存問如中山癸卯還中山己酉講武唐水之陽庚戌車駕還宮沙門法秀謀反伏誅假梁郡王嘉大破齊俘獲三萬餘口

送京師三月辛酉朔幸肆州癸亥講武雲水之陽所經者察守宰黜陟之己巳車駕還宮詔曰法秀妖作亂常妄說符瑞蘭臺御史張求等一百餘人招結奴隸謀為大逆有司科以族誅誠合刑憲但矜愚重命猶所不認其五族者降止同祖三族止一門門誅止身夏四月己亥行幸方山建永固石室于山立碑銘太皇太后終制于金冊又起鑿玄殿甲寅以旱故詔所在掩骸骨祈禱神祇任城王雲薨五月庚申以農月時要詔天下勿使

有農獄六月甲辰中山王獻死戊午封皇叔簡為齊郡
王猛為安豐王秋七月庚申朔日有蝕之甲子齊人來
聘九月庚午閱武于南郊大饗羣臣齊使車僧朗以班
在宋使殷靈誕後辭不就席宋降人解奉君刀僧朗于
會中詔誅奉君等乙亥封昌黎王馮熙世子誕為南平
王冬十二月癸巳州鎮十二饑詔開倉賑恤是歲鄧至
柔然等國並遣使朝貢

六年春正月甲戌大赦二月辛卯詔以靈丘郡土既禘

瘠又諸州路衝復其民租十二年癸巳白蘭王吐谷渾翼世以誣罔伏誅乙未詔曰蕭道成逆亂江淮戎旂頻舉七州之民既有征運之勞深罪輕徭之義其復常調三年癸丑賜王公已下清勤著稱者穀帛有差三月庚辰幸虎園詔曰虎狼猛暴食肉殘生取捕之日每多傷害從今勿復捕貢辛巳幸武州石窟寺賜貧老衣服是月齊高帝殂夏四月甲辰賜畿內鰥寡孤獨不能自存者粟帛各有差秋七月發州郡五萬人修靈丘道八

月癸卯朔分遣大使巡行境內遭水之處丐其租賦貧
儉不自存者賜以粟帛庚子罷三澤禁九月辛酉以氏
楊後起為武都王

魏書載冬十二月丁亥詔曰去秋淫雨洪水為災百
姓嗷然故遣使者巡方賑恤而牧守不思利民之道
期于取辦愛毛反裘甚無謂也今課督未入及將來
租算一以丐之

是歲地豆干吐谷渾等國並遣使朝貢

冊府元龜載是年十一月帝親祀七廟

七年春正月庚申詔曰朕每思知百姓疾苦增修寬政
故具問守宰苛虐之狀于州郡使者今秀孝計掾對多
不寔甚乖朕虛求之意宜案以大辟明罔上必誅然情
猶未忍可恕罪聽歸申下天下使知後犯無恕丁卯詔
青齊光東徐四州戶運倉粟二十萬石送瑕丘琅邪復
租竿一年三月甲戌以其定二州饑詔郡縣煮粥于路
食之又弛關津之禁夏四月庚子幸崞山賜所過鰥寡

不能自存者衣服粟帛壬寅車駕還宮閏月癸丑皇子
生大赦五月戊寅朔幸武州山石窟佛寺六月定州上
言為粥所活九十四萬七千餘口秋七月甲申詔假員
外散騎常侍李彪員外郎蘭英使于齊改封濟南王羅
拔為趙郡王九月壬寅詔求讜言

魏書載詔曰朕聽政之際推慮末周案文審獄思聞
已過自今羣官奏事當獻可替否無或面從俾朕之
過彰于遠近

冀州上言為粥所活七十五萬一千七百餘口冬十月
戊午皇信堂成十一月辛丑齊人來聘十二月乙巳朔
日有蝕之癸丑詔曰夏殷不嫌一族之婚周室始絕同
姓之娶斯皆教隨時設政因事改者也皇運初基日不
暇給古風遺樸未遑釐改朕思易質求式昭維新自今
悉禁絕之有犯者以不道論庚午開林慮山禁與民共
之州鎮十三飢詔開倉賑恤

是歲齊武帝永明元年

八年春正月詔隴西公琛尚書陸獻為東西二道大使
褒善罰惡夏四月甲寅幸方山戊子還宮庚申行幸旋
鴻池遂幸崞山丁卯還宮五月己卯詔賑賜河南七州
甲申詔員外散騎常侍李彪等使于齊六月丁卯詔曰
制官班祿行之尚矣自中原喪亂茲制中絕先朝因循
未遑釐改朕顧憲章舊典始班俸祿罷諸商人以簡人
事戶增調三匹穀二斛九斗以為官司之祿均預調為
二匹之賦即兼商用雖有一時之煩終克永逸之益祿

行之後賦滿一匹者死變法改度宜為更始其大赦天下與之惟新戊辰武州水壞民居秋七月乙卯行幸方山石窟寺八月甲辰詔以班制俸祿更興刑書寬猛未允人或異議制百辟卿士工商吏民各上便宜勿有所隱

魏書載秋八月甲辰詔曰帝業至重非廣詢博採無以興功先王知其如此是以諫鼓置于堯世謗木立于舜庭庸能耳目四達庶類咸熙承明之初班下內

外聽各盡規以補其闕中旨雖宣允稱者少故變時
法遠遵古典班制俸祿改更刑書寬猛未允人或異
議思言者莫由申情求諫者無因自達故令上明不
周下情壅塞今制百辟卿士工商吏民各上便宜利
民益治損化傷政直言極諫勿有所隱務令詞無煩
華理從簡寔朕將親覽使言之無罪聞之者足戒

九月甲午齊人來聘戊戌詔俸制十月為首每季一請
于是內外百官受祿有差冬十一月乙未詔員外散騎

常侍李彪等使于齊十二月州鎮十五水旱人饑詔使
者開倉賑恤是歲柔然高麗等國各遣使朝貢

九年春正月戊寅詔禁圖讖秘緯及名孔子閉房記留
者以大辟論又諸巫覡假稱神鬼妄言吉凶及委巷諸
非墳典所載者嚴加禁斷癸未大饗羣臣于太華殿班
賜皇詔二月己亥制皇子封王者皇孫皇曾孫紹封者
皇女封者歲祿各有差封廣陽王建第二子嘉為廣陽
王乙巳詔百辟卿士工商吏民各上書極諫靡有所隱

三月丙申封皇弟禧為咸陽王幹為河南王羽為廣陵
王雍為潁州王勰為始平王詳為北海王夏四月癸丑
幸方山甲寅還宮五月齊人來聘六月辛亥幸方山
遂幸靈泉池己巳還宮秋七月丙午朔新作諸門癸未
遣使拜宕昌王梁彌機兄子彌承為宕昌王戊子幸魚
池登青原岡甲午還宮八月己亥行幸彌澤甲寅登牛
頭山庚申詔曰教州災水饑饉薦臻致有賣鬻男女者
天譴在予一人百姓橫罹報毒今自太和六年己來買

定冀幽相四州饑民良口者盡還所親雖嫗為妻妾遇
之非理情不樂者亦離之甲子還宮冬十月丁未詔使
者循行州郡與牧守均給天下之田還受以生死為斷
勸課農桑興富人之本

魏書載詔曰朕每覽先王之典經論百代儲畜既積
黎民永安爰暨季葉斯道陵替富强者并兼山澤貧
弱望絕一廛致令地有遺利民無餘財或爭畝畔以
亡軀或因饑饉以棄業而欲百姓豐足安可得哉今

遣使者循行州郡與牧守均給天下之田還受以生
死為斷勸課農桑興富民之本

辛酉司徒魏郡王陳建薨詔員外散騎常侍李彪尚書
郎公孫阿六頭使于齊十二月乙卯以侍中淮南王他
為司徒是歲京師及州鎮十三水旱傷稼巖昌高麗吐
谷渾等國並遣使朝貢

十年春正月癸亥朔帝始服袞冕朝饗萬國二月戊戌
初立黨里鄰三長定民戶籍

魏書食貨志載詔曰任土錯貢所以通有無井乘定
賦所以均勞逸有無通則民財不匱勞逸則則民安
其業又鄰里鄉黨之制所由來久欲使家至日見以
大督小從近及遠然後義興訟息自昔以來諸州戶
口籍貫不寔寶藏隱漏廢公罔私富强者并無有餘
貧弱者餬口不給賦稅無輕重之殊力役無衆寡之
別雖建九品之格而豐埆之土未融雖立均輸之條
而蠶織之鄉無異今革舊從新為里黨之法在所牧

守宜以喻民使知去煩即簡之要

三月庚戌齊人來聘夏四月辛酉朔始制五等公服甲子帝初法服御輦祀西郊癸酉幸靈泉池戊寅還宮六月辛酉幸方山己卯名皇子曰恂大赦秋七月戊戌幸

方山

魏書靈徵志載是年七月建興護澤縣民賈日中養蠶有絲網成幕中有卷物似絹帶長四尺廣三寸薄上復得黃繭二如履形

欽定四庫全書

南北史卷之九

三

八月乙亥給尚書五等品爵已上珠衣玉佩大小組綬
九月辛卯詔起明堂辟雍冬十月癸酉有司議依故事
配始祖于南郊十一月議定州縣官依口給俸十二月
乙酉汝南潁州饑詔丐田租開倉賑恤是歲柔然高麗
吐谷渾勿吉等國並遣使朝貢

十一年春正月丁亥朔詔定樂章非雅者除之二月甲
子肆州之鴈門及代郡民饑詔開倉賑恤夏五月壬辰
幸靈泉池遂幸方山癸巳南平王渾瑊甲午車駕還宮

詔復七廟子孫及外戚總麻已上賦役無所與六月辛巳秦州民饑詔開倉賑恤

魏書載詔曰春旱至今野無青草上天致譴實由匪德百姓無辜罹饑饉寤寐思求罔知所益公卿內外股肱之臣其極言無隱以救民瘼

秋七月己丑詔今年穀不登聽民出關就食遣使者造籍分遣去留所在開倉賑恤八月壬申柔然犯塞遣平原王陸獻討之庚辰大議比代辛巳罷山北苑以其地

賜貧民

魏書載九月庚戌詔曰去夏以歲旱民饑須遣就食
舊籍雜亂難可分簡故依局割民閭戶造籍欲令去
留得寔賑貸平均然適者以來猶有餓死衢路無人
收識良由本部不明籍貫未寔廩恤不周以至于此
朕猥居民上聞用慨然可重遣精檢勿令遺漏

冬十月辛未詔罷起部無益之作出宮人不執機杼者
甲戌詔曰鄉飲禮廢則長幼序亂孟冬十月民間歲隙

宜于此時導以德義可下諸州黨里內推賢而長者教
其里人父慈子孝兄友弟順夫和妻柔不率長教者具
以名聞十一月丁未詔罷尚方錦繡綾羅之工百姓欲
造任之無禁其御府衣服金銀珠玉綾紬綿太官雜器
太僕乘具內庫弓矢出其大半班賚百官及京師士庶
下至工商皂隸逮于六鎮戍士各有差戊申詔今寒氣
勁切杖箠難任自今月至來年孟夏不聽拷問罪人又
歲饑輕囚宜速決無令簿罪久留獄犴十二月詔秘書

丞李彪著作郎崔光改析國記依紀傳體是歲大饑詔
所在開倉賑恤吐谷渾悉萬斤高麗等國並遣使朝貢
十二年春正月辛巳朔初建五牛旌旂乙未詔鎮戍流
徒之人年滿七十孤單窮獨無成人子孫旁無耆親者
具狀以聞二月辛亥朔日有蝕之三月丁亥中散梁衆
保等謀反伏誅夏四月甲子大赦乙丑幸靈泉池丁卯
遂幸方山己巳還宮齊將陳顯達攻陷澧長樂王穆亮
率騎討之五月丁酉詔六鎮雲中河西及關內郡各修

水田通渠溉灌壬寅增置彛器于太廟秋七月己丑幸
靈泉池遂幸方山己亥還宮九月甲午詔曰在昔古誠
稱日蝕修德月蝕修刑逆者癸巳夜月蝕盡公卿已下
宜慎刑罰以答天意丁酉起宣文堂經武殿癸卯淮南
王他薨冬閏十月甲子帝觀築園丘于南郊辛未幸靈
泉池癸丑還宮十一月雍豫二州民饑詔開倉賑恤梁
州刺史臨淮王提坐貪縱配北鎮

冊府元龜曰是年詔羣臣求安民術有司上言請折

州常調九分之二京師度支歲用之餘各立官司豐年糴儲于倉時儉則加私之一糶之于民如此民必力田以買絹積財以取官粟年豐則常積歲凶則直給又別立農官取州郡戶十分之一為屯民相水陸之宜斷頃畝之數以賦贖雜物市牛科給令其肆力一夫之田歲貢六十斛甄其正課并征戍雜役行此二事數年中則穀積民足矣帝善而行之自此公私豐贍雖時有水旱亦不為災

是歲高麗宕昌吐谷渾勿吉武興等國並遣使朝貢
十三年春正月辛亥祀圓丘初備大駕乙丑兗州人王
伯恭聚衆勞山自稱齊王東萊鎮將孔伯孫討斬之戊
辰齊人寇邊淮南太守王僧雋擊走之二月庚子引羣
訪政道得失捐益之宜三月夏州刺史章武王彬以貪
財削封夏四月丁丑詔曰升樓散物以賚百姓至使人
馬騰踐多有毀傷今可斷之以本所費之物賜貧老窮
獨者州鎮十五大饑詔所在開倉賑恤丁亥幸靈泉池

遂幸方山己丑還宮五月庚戌祀方澤六月汝陰王天
賜南安王禎並坐賦免為庶人秋七月丙寅幸靈泉池
與羣臣御龍舟賦詩而罷立孔子廟于京師八月乙亥
詔兼員外散騎常侍邢彥兼員外散騎侍郎侯靈紹使
于齊

魏書載戊子詔諸州鎮有水田者各通灌溉遣匠者
所在指授

九月出宮人賜北鎮人貧鰥者冬十一月安豐王猛薨

十二月丙子司空河東王苟顏薨甲午齊人來聘己亥
以尚書令尉元為司徒左僕射穆亮為司空是歲高麗
吐谷渾陰平中赤武興巖昌等國各遣使朝貢

十四年春正月己巳朔日有蝕之行幸方山二月辛未
行幸靈泉池壬申還宮三月初詔定起居注制己卯詔
遣侍臣巡行州郡問民疾苦夏四月地豆千頓犯塞甲
戌征西大將軍陽平王熙擊走之甲午詔兼員外散騎
常侍邢產蘇季連使于齊五月己酉庫莫奚犯塞安州

欽定四庫全書

都將樓龍兒擊走之沙門司馬御忠自言聖王謀破平原郡擒獲伏誅秋七月甲辰詔罷都牧雜制丙午行幸方山丙辰幸靈泉池八月丙寅朔還宮辛卯詔議國之行次九月癸丑太皇太后馮氏死詔聽藩鎮曾經內侍者前後奔赴冬十月戊辰詔將親侍龍輿奉訣陵隧諸常從之具悉可停之其武衛之官防侍如法癸酉葬文明太皇太后于永固陵甲戌謁永固陵羣臣固請公除帝不許己卯謁永固陵庚辰帝居廬引見羣僚于太和

殿太尉東陽王丕等據權制用請帝引古禮往復羣臣
乃止京兆王太興有罪免官削爵詔曰公卿屢依金冊
遺旨中代權制式請過塋即吉朕思宗遠古終年之制
依禮既虞卒哭此月二十一日授服以葛易麻既以衰
服在上公御不得獨釋于下故于朕之授服變從練禮
已下復為節制斟酌古今以制厥衷且取遺旨速除之
一端粗申臣子罔極之巨痛癸未詔曰朕遠宗古式欲
終三年之禮百辟羣臣據金冊顧命將奪朕心從先朝

之制朕仰惟金冊俯自推省取諸二衷不許衆議以衰
服過期終四節之慕又奉遵聖訓聿修誥旨不敢闇默
自居以曠機政庶不愆遺令意差展哀慕之情並下州
鎮長至三元絕告慶之禮甲申車駕謁永固陵十一月
甲寅詔內外職人先班朝次及諸方雜克冬至之日盡
聽入林三品已下衰服者至夕復臨餘旦臨而已哭拜
之節一依別議

魏書禮志曰太和十四年秋九月文明太后崩將營

山陵諸王公表請特定北域及依漢魏故事既葬公
除詔曰自遭禍罰奉侍梓宮猶希髣髴山陵遷厝所
未忍聞冬十月王公等復固請詔曰山陵可依典冊
衰服之宜情所未忍遂葬太后于永固陵諸王固請
公除未許既引見太尉丕及羣臣于太和殿前哭拜
盡哀出幸思賢門右詔尚書李冲宣旨曰先后平日
每集羣官共論政治何圖獨見公卿言及喪事五內
崩摧丕等進曰我遠祖每遇大諱惟侍從梓宮者凶

服左右皆從吉四祖三宗因而無改陛下哀毀過禮
所遇三食不滿半溢晝夜不釋經帶願少抑至慕奉
行舊典帝曰哀毀常事朝夕食粥粗可支任所奏舊
事亦因祖宗情專武畧未遑文教朕仰稟慈訓論時
比事與先世不同今暫抑哀慕躬自披尋且以所懷
詔問尚書游明根高閭等曰聖人制卒哭禮授練之
變皆奪情以前今旬日即吉特成傷理對曰臣等尋
太后遺旨踰月而葬葬即吉故于下葬初奏練除事

帝曰朕惟中代不遂三年之喪者由君上違世儲宮
初立自襲袞冕示皇極之尊朕在位過紀億兆知有
君矣于此不遂哀慕使情理俱損喪紀圯壞誠可痛
恨閻曰杜預論自古天子無行三年喪者漢文腊與
古合事可承踵帝曰竊尋聖母之旨令早即吉者慮
荒政事故也今不敢閻然以荒庶政惟欲存衰麻廢
吉禮朔望盡哀情在可許故專欲行之如杜預所論
誣矣秘書丞李彪曰漢馬后保養章帝葬不淹旬即

已從吉然章帝不受誣焉后不損名願陛下割哀從
議帝曰朕聞孝子居喪見美麗則思親故釋錦服衰
內外相稱非虛加也今者豈徒顧禮違議苟免嗤嫵
抑情發于中奉終之事一遵遺冊痛慕之心事係于
予聞曰陛下不除服于上臣等獨除于下則臣道不
足又親御衰麻復聽朝政吉凶事雜臣竊為疑帝曰
卿等猶以朕未除服不忍先除奈何令朕獨忍于親
今仰逼遺冊不遂乃心惟欲居廬服喪升堂襲素使

大政不荒哀情獲遂謂為可耳羣臣各以親疎貴賤
遠近為除服之差彪曰三年不改父道今不遵冊恐
陟改道之嫌帝曰改父之道蓋謂慢孝忘親縱有可
陟寧受後代之譏未忍今日之情又前表稱古者葬
而即吉蓋季俗多亂權宜救世耳公卿偏執一隅謂
經世之要在斯非義也彪今雖治化清晏然江南有
未賓之吳漠北有不臣之鹵是以臣子猶懷不虞帝
曰魯公帶經從戎晉侯墨衰敗敵如有不虞越緋無

嫵况衰麻乎豈可以晏安之辰預念軍旅以廢喪紀
者朕在不言之地但公卿執奪朕情遂成性復追用
悲絕帝遂號痛羣臣亦哭而辭出

丁巳齊人來聘十二月壬午詔依準丘井之式遣使與
州郡宣行條制隱口漏丁即聽附寔若朋附豪勢凌折
孤獨罪有常制是歲吐谷渾巖昌武興陰平高麗等國
並遣使朝貢

十五年春正月丁巳帝始聽政于皇信東室初分置左

右史官癸亥晦日有蝕之二月己丑齊人來聘三月甲辰車駕謁永固陵夏四月癸亥帝始進蔬食乙丑謁永固陵

魏書禮志曰帝設薦于太和廟是日始薦蔬食追感哀慕終日不食侍中馮誕等諫經宿及膳甲子罷朝夕哭

自正月不雨至于癸酉有司奏祈百神詔曰

魏書禮志曰昔成湯遇旱齊景逢災並不祈山川致

金史口乃
雨皆至誠發衷澍潤千里萬方有罪在予一人

何宜四氣未周便行禮事唯當考躬責已以待天譴甲
戌詔員外散騎常侍李彪假散騎侍郎蔣少遊使于齊
己卯經始明堂改營太廟五月己亥議改律令于東明
觀折疑獄乙卯枹罕鎮將長孫百年攻吐谷渾所置洮
陽泥和二戌剋之俘獲三萬餘人詔悉免歸丙辰詔造
五輅六月丁未濟陰王爵以貪殘賜死秋七月乙丑謁
永固陵規建壽陵己卯詔議祖宗以道武皇帝為太祖

魏書禮志載詔曰禮祖有功宗有德烈祖有創基之
功世祖有開拓之德宜為祖宗百世不遷遠祖平文
功未及于昭成廟號太祖道武建業之勲高于平文
而廟號烈祖比功校德以為未允今尊道武為太祖
與顯祖為二祧餘以次遷愚按上文語氣以世祖與
烈祖並稱不知何以復改為顯祖疑魏書誤資治通
鑑又改云以世祖顯祖為二祧蓋亦疑其誤也不如
徑改為太祖世祖是太祖先號烈祖讀者辨之

乙酉車駕巡省京邑聽訟而還八月壬辰議養老又議肆類上帝禋于六宗禮帝親臨決詔郡國有時物可以薦宗廟者貢之戊戌移道壇于疊乾之陰改曰崇虛寺己亥詔諸州舉秀才先盡才學乙巳親定禘祫禮

魏書載是月甲寅集羣臣詔曰近論朝日夕月皆欲以二分之一日行禮然月有餘閏行無常準若一依分日或值月出于東而行禮于西尋情即理不可施行昔秘書監薛調等謂朝日以朔夕月以朏卿等謂朔

肫二分何者為是尚書游明根等請用朔肫從之
丁巳議律令事仍省雜祀

魏書禮志載詔曰國家自先朝以來饗祀諸祀凡一
千二百餘處今欲減省羣祀務從儉約昔漢高祖所
祀衆神及寢廟不少元成之際匡衡執論乃得減省
光武之世禮儀始備饗祀有序神聰明正直不待煩
祀也

九月辛巳齊人來聘

魏書禮志曰丙戌有司上言請卜祥日詔曰便及此期覽以摧絕筮日求吉有乖敬事之志又違永慕之心今直用晦日丁亥帝夜宿于廟帥羣臣哭已帝易服縞冠革帶黑履侍臣易服黑介幘白絹單衣革帶烏衣遂哭盡乙夜戊子晦帝易祭服縞冠素幘白布深衣麻繩履侍臣去幘易幘羣臣易服如侍臣又引入如前儀曹尚書游明根升廟跽慰復位哭遂出引太守外臣及諸渠帥入哭次引南國使臣并入客人

至甲夜四刻侍御散騎常侍司衛監以上升廟哭既
而出帝出廟停之哀哭久乃還

冬十月庚寅

魏書禮志曰太尉丕奏太廟已就移廟日須得國之
大姓遷主安廟詔答曰遷奉神主皆太尉事朕亦親
行事時運流速奄及縞制復不得哀哭明堂後當親
拜山陵寫泄哀慕

車駕謁永固陵是月明堂太廟成十一月

欽定四庫全書

南北朝史注

三七

魏書禮志曰己未朔帝禫于太和廟袞冕以祭己冠
黑介幘素紗深衣拜陵而還癸亥冬至車駕祀圓丘
遂祀明堂還至太和廟乃入甲子入太華殿服通天
冠絳紗袍以享羣臣帝感慕樂懸而不作丁卯服袞
冕辭太和廟帥百官奉祀遷于新廟 愚按孝文之
服馮后也宋儒胡寅謂馮后弑獻文于孝文為不共
不應服非所服獨明方孝儒駁之云獻文于孝文則
父子馮后則子母雖不慈子道不可不盡况孝文乃

其孫若母殺子而孫得仇是知有父而不知父有親也予故兩採其說備錄孝文居喪始末附本紀下若文自孝孫而馮后自逆后觀綱目書弒其主弘便見予之不臚列馮后傳內以此

丁卯遷七廟神主于新廟乙亥大定官品

魏書禮志曰詔罷羣臣季冬朝賀袴褶行事謂之小歲者

戊寅考諸牧守詔假通直散騎常侍李彪假散騎侍郎

蔣少遊聘于齊丁亥詔二千石考上上者假四品將軍
賜乘黃馬一匹上中者五品將軍上下者衣一襲十二
月壬辰遷社于內城之西癸巳帝臨朝堂詔班賜刺史
以下衣冠以安定王休為太傅齊郡王簡為太保帝為
高麗王璉舉哀于城東行宮己酉車駕迎春于東郊辛
卯詔簡選樂官

冊府元龜載詔曰樂者感天地感神祇調陰陽通人
鬼治用大矣逮末俗凌夷正聲傾廢多好鄭衛以悅

耳目故使樂官散缺伶官失守今方釐革敝章稽古
復令樂正雅頌各得其宜今置樂官寔須任職不得
仍令濫吹

是歲吐谷渾悉萬斤高麗鄧至巖昌等國並遣使朝貢
十六年春正月戊午朔朝饗羣臣于太華殿帝始為王
公興縣而不樂

魏書樂志載詔曰禮樂之道自古所先作樂和中制
禮坊外音聲之用其致遠矣有周之季斯道崩缺故

夫子忘味于聞韶正樂于返魯遠漢魏見樂章復缺
然博採音韻粗有篇條皇室之興干戈仍用文教未
淳失治定之雅音習不典之繁曲比大樂奏其職司
愧感薰懷禮樂事大為化之本可詳採古今以備茲
典內外有才堪此任者任其參議

己未宗祀顯祖獻文皇帝于明堂以配上帝遂升堂以
觀雲物降居青陽左个布政事每朔依以為常辛酉詔
以太祖配南郊壬戌詔定行次以水承金甲子詔罷祖

裸乙丑詔制諸遠屬非太祖子孫及異姓為王者皆降
為公公為侯侯伯子男仍舊皆除將軍號戊辰帝臨思
義殿某間秀孝丙子始以孟月祭廟二月戊子帝移御永
樂宮庚寅壞太華殿經始太極殿辛卯罷寒食享壬辰
幸北部曹歷觀諸巡省京邑聽理冤訟甲午車駕初朔
日于東郊遂以為常丁酉詔祀唐堯于平陽虞舜于廣甯
夏禹于安邑周文于洛陽丁未帝臨宣文堂改謚宣尼
曰文聖尼父告謚孔廟

魏書禮志曰帝齋中書省親拜祭于廟

三月丁卯巡省京邑癸酉省西郊郊天雜事乙亥車駕
初迎年于南郊自此為常辛巳以高麗王璉孫雲為其
國王齊人來聘夏四月丁亥朔頒新曆令大赦甲寅幸
皇宗學親問博士經義五月癸未詔羣臣于皇信堂更
定律條流徒限制帝親臨決之

魏書載六月甲辰詔曰務農重穀王政所先今四氣
休序時澤旁潤宜用天分地悉力東畝然京師之民

游食者衆不加督勸或耘耨失時可使檢察勤惰以聞

秋七月壬戌詔曰

冊府元龜載詔曰王者設官分職垂拱責成振綱舉網衆目斯理朕德謝知人豈能一見鑒識徒乖為君委授之義

自今選舉每以季月本曹與吏部銓簡甲戌詔兼員外散騎常侍宋弁使于齊八月庚寅車駕初祀夕月于西

金史紀事本末卷之八十一
郊遂以為常乙未詔陽平王熙左僕射陸元愨十二將
北討柔然丙午巖昌王梁彌承來朝司徒尉元以老遜
己酉詔以尉元為三老游明根為五更又養國老庶老
將行大射之禮而不克成癸丑詔曰國家雖宗文以懷
九服修武以寧八荒然于習武之方猶為未盡將于馬
射之前先行講武之式可教有司豫修場埒其列陣之
儀五戎之數別俟後制九月甲寅朔大序昭穆于明堂
祀文明太皇太后于玄堂辛未帝哭于陵左終日不絕

聲壬申復以再周忌日哭于陵左絕膳三日哀至則哭
甲戌帝拜哭辭陵還永樂宮辛巳武興王楊集始來朝
冬十月己亥以太傅安定王休為大司馬特進馮誕為
司徒

冊府元龜載是月己亥詔曰先王制禮郊天享祖莫
不配祭然而有節曰登廟常用季秋躬駕展虔祝禮
或有褻慢之失嘉樂頗陟野合之儀然授衣之旦享祭
明堂立冬之始奉烝太廟若復致齋白登便為一月

兩駕白登之高未若九室之美幃次之華未如清廟之盛將欲廢彼東山之祀成此二享之敬可勅有司攝行祭事

甲辰詔以功臣配饗太廟庚戌太極殿成饗羣臣十一月乙卯依古大寢權制三室以安昌殿為內寢皇信堂為中寢四下為外寢十二月賜京邑老人鳩杖齊人來聘是歲高麗鄧至契丹巖昌吐谷渾等國並遣使朝貢十七年春正月壬子朔饗百僚于太極殿乙丑詔大賜

諸蕃君長車旂衣馬錦綵繒纈多者一千少者三百各以命數為差詔兼員外散騎常侍邢巒使于齊丙子以吐谷渾伏連籌為其國王庚辰薊大司馬安定王休太保齊郡王簡朔望之朝二月乙酉詔賜議律令之官各有差己酉車駕始藉田于都南三月戊辰改作後宮夏四月戊戌立皇后馮氏是月齊直閭將軍蠻曾田益宗率部落內屬五月五壬戌宴四廟子孫于宣文堂帝親與之齒行家人禮甲子帝臨朝堂引見公卿以下決疑

政錄囚徒丁丑以旱徹膳襄陽蠻酋雷婆思等率其部落內徙居于太和川六月庚辰朔日有蝕之丙戌帝將南伐詔造河橋乙未講武乙巳詔曰比百秩雖陳事典未叙自八元樹位躬加省覽作職員令二十一卷事迫戎期未善周悉須待軍回更論所闕權可付外施行立皇子恂為皇太子秋七月癸丑以皇太子立詔賜人為父後者爵一級為公士曾為吏屬者爵二級為上造鰥寡孤獨不能自存者人粟五斛戊午中外戒嚴是月齊

武帝殂八月乙酉三老山陽郡公尉元卒丙戌車駕類
于上帝遂臨尉元喪丁亥帝辭永固陵己丑發京師南
伐步騎三十餘萬太尉丕奏請以宮人從詔以臨戎不
語內事不許壬寅車駕至肆州民年七十已上賜爵一
級路見眇跛停駕親問賜衣食復終身戊申幸并州親
見高年問疾苦九月壬子詔兼員外散騎常侍高聰賈
禎聘于齊丁巳詔車駕所經傷民秋稼者畝給穀五斛
戊辰濟河詔洛懷并肆所過回州賜高年爵恤鰥寡孤

獨各有差孝悌廉義文武應求者皆以名聞又詔廨養
戶不得與庶士婚有文武之才積勞應進者同庶族例
聽之庚午幸洛陽周巡故宮基跡帝顧謂侍臣曰晉德
不修荒毀至此遂詠黍離詩為之流涕壬申觀河橋幸
太學觀石經丙子詔六軍發軫丁丑帝戎服執鞭御馬
而出羣臣稽顙于馬前請停南伐帝乃止仍議遷都計
冬十月戊寅朔幸金墉城詔大司空穆亮與尚書李冲
將作大匠董爵經始洛京

河南志云東西二十里南北十五里廟社宮室會府
以外方三百步為一里開四門置里正四人門士八
人總二百二十里宣武景明二年築坊三百二十各
周一千二百

己卯幸河南城乙酉幸豫州癸巳次石濟乙未解嚴設
壇于滑臺宮詔京師及諸州從戎者賜爵一級應募者
加二級主將加三級癸卯幸鄴城乙巳詔安定王休率
從官迎家口于代車駕送于漳水上初帝之南伐起宮

殿于鄴西十一月癸亥宮成徙御焉十二月戊寅巡省
六軍已未詔隱恤軍士死亡疾病務令優給是歲勿吉
吐谷渾巖昌陰平契丹庫莫奚高麗鄧至等國並遣使
朝貢

十八年春正月丁未朔朝羣臣于鄴宮澄鸞殿癸亥南
巡詔相兗豫三州賜高年爵恤鰥寡孤獨各有差孝悌
廉義文武應求者皆以名聞戊辰經殷比干墓祭以太
牢乙亥幸洛陽西宮二月己丑行幸河陰規建方澤之

所丙申徙封河南王幹為趙郡王頴州王雍為高陽王
壬寅北巡癸卯齊人來聘甲辰詔喻天下以遷都意閏
月癸亥次苟注陘南皇太子朝于蒲地壬申至平城宮
癸酉臨朝堂部分遷留甲戌謁永固陵三月庚辰罷西
郊祭天壬辰帝臨太極殿喻在代羣臣遷移之畧夏五
月甲戌朔日有蝕之乙亥詔罷五月五日七月七日饗
六月己巳詔無員外散騎常侍盧昶王清石使于齊秋
七月乙亥以宋王劉昶為大將軍壬午侍中大司馬安

定王休薨壬辰北巡戊戌謁金陵辛丑幸朔州是月齊
蕭鸞弒其主昭業八月癸亥皇太子朝于行宮甲辰行
幸陰山觀雲川丁未幸閱武臺臨觀講武因幸懷朔武
川撫冥柔玄等四鎮乙丑南還所過皆親見高年問民
疾苦貧窮孤獨賜以粟帛丙寅詔六鎮及禦夷城人年
老孤貧廢疾者賜粟宥罪各有差戊辰車駕至旋鴻池
庚午謁永固陵辛未還平城宮九月壬申朔詔曰三載
考績自古通經三考黜陟以彰能否朕今三載一考考

即黜陟欲令愚滯無妨于賢者才能不壅于下位各令當曹考其優劣為三等六品以下尚書重問五品已上朕將親與公卿論其善惡上上者遷之天下者黜之中中者守其本任壬午帝臨朝堂親加黜陟壬辰陰平王陽炅來朝冬十月甲辰以太尉東陽王丕為太傅戊申親告太廟奉迎神主辛亥車駕發平城宮壬戌次于中山之唐湖乙丑分遣侍臣巡問疾苦己巳幸信都庚午詔曰比聞緣邊之蠻多有竊掠致父子乖離室家分絕

冊府元龜曰朕方混一區宇若苟如此南人豈知朝
德哉

可詔荆郢東荆三州勒諸蠻人勿有侵暴是歲齊蕭鸞
弒其主昭文而自立十一月辛未朔詔冀定二州賜高
年爵恤鰥寡孤獨各有差孝義廉貞文武應求者俱以
名聞丁丑幸鄴甲申經比干墓親為弔文樹碑列之

河南通志載其文云惟皇邁遷中之元載御次乎闕
茂望舒會于星紀十有四日厥惟甲申指松面而搖

步順京途以啓征路歷商區轄屆衛壤遂旁睨古跡
游瞰曩風睹比干之墓悵然悼懷焉聊興其韵貽弔
云爾曰三才之肇元兮敷五靈以扶德含剛柔于金
一木兮資明闡于南北重離耀其炎暉兮習坎司玄以
秉黑伊稟常之懷生兮昏睿遞其啓明晝皎皎其何
朗兮夜幽幽而致蔽哲人昭昭而澄光兮狂夫黜黜
其若翳浴堯舜之耿介兮何桀紂之猖敗沈湎而不
知慎兮終惑己以貽戾寥寥兮比干籍胄兮殷宗含

精兮誕粹真樹兮英風稟蘭露以滌神餐菊英而儼
容如薜荔以蕩識佩江離而麗躬履霜以結水兮萃
寤忠而彌濃千金豈其吾珍兮皇舉寔余所鍾奮誠
諫而燼軀兮道危言以礪鋒嗚呼哀哉嗚呼哀哉惟
子在殷實為梁棟外贊九功內徽辰共匡率袞職德
音遐洞周師返旆非子誰貢否哉悖運遺此不辰三
綱道沒七曜輝泯負乘竊器怠棄天倫懷誠齊怒謹
言焉陳鬼侯已醢子不見歟鄂侯已脯子不問歟微

子去矣子不知歟箕子奴矣子不覺歟何其輕生致
死歟何其愛義勇若歸歟遺休既灰不其惜歟永以
無返不其痛歟嗚呼哀哉嗚呼哀哉曷不相時以卷
舒兮徒委質而顛亡雖虛名空傳于千載詎何勲之
可揚奚若騰魂以遠逝疾飛足而歸昌德比肩乎尚
父卒同協于周王建鴻績于盛辰豈肯宇于齊方闡
穆音于萬祀傳光業以修長而乃自受茲斃視竅殷
辛剖心無補迷機喪身脫非武發封墓誰因嗚呼介

士胡不我臣愚按是歲寔太和八年都洛之始年也
故云元載歲在甲戌故云閏茂月旅仲冬故云星紀
朔次辛未故云十有四日

己丑車駕至洛陽十二月辛丑朔分命諸將南征壬寅
革衣服之制癸卯詔中外戒嚴戊申復代遷戶租賦三
歲己酉詔王公伯子男開國食邑者王食半公三分食
一侯伯四分食一子男五分食一辛亥車駕南伐丁卯
詔鄴豫二州賜高年爵恤孤寡鰥老各有差緣路之丁

復田租一歲孝悌廉貞文武應求者具以名聞戊辰車
駕至懸瓠己巳詔壽陽鍾離馬頭之師所獲男女口皆
放還南是歲高麗國遣使朝貢

是歲齊主昭業隆昌元年昭文延興元年又明帝建
武元年

十九年春正月辛未朔朝饗羣臣于懸瓠癸酉詔禁淮
北人不得侵掠犯者以大辟論甲戌檄諭齊主鸞壬午
講武于汝水西大賚六軍平南將軍王肅左將軍元麗

並大破齊軍己亥車駕濟淮二月甲辰幸八公山路中
雨甚詔去蓋見軍士病者親隱恤之戊申車駕巡淮南
東民皆安堵租運屬路丙辰幸鍾離戊午軍士擒齊人
三千帝曰在君為君其人何罪于是免歸辛酉發鍾離
將臨江水司徒馮誕卒壬戌詔班師丁丑遣使臨江數
齊主罪惡三月戊子太師馮熙卒夏四月丁未曲赦徐
豫二州其轉運之士復租三年辛亥詔賜高年爵恤孤
寡老疾各有差德著邱園者具以名聞齊人降者給復

十五年癸丑幸小沛使以太牢祭漢高祖廟己未幸瑕
丘使以太牢祀岱嶽詔宿衛武官增位一級庚申幸魯
城親祀孔子廟辛酉詔拜孔氏四人顏氏二人為官兗
州刺史舉部內士人堪軍國及守宰政績者具以名聞
詔賜兗州人爵及粟帛如徐州又詔選諸孔宗子一人
封崇聖侯邑一百戶以奉孔子祀命兗州為孔子起園
陌修飾墳隴更建碑銘褒揚聖德戊辰行幸嗚噉太和
廟成五月己巳城陽王鸞諸陽失利降為定襄縣王廣

川王諧薨庚午遷文成皇后馮氏神主于太和廟甲戌
行幸滑臺丙子次于石濟庚辰皇太子朝于平桃城癸
未車駕至自南伐甲戌減閒官祿以裨軍國之用乙酉
行飲至禮班賜各有差甲午皇太子冠于廟六月己亥
詔不得以北俗之語言于朝廷違者免所居官辛丑詔
復軍士從駕渡淮者租賦三年癸卯詔皇太子赴平城
宮壬子詔濟州東郡祭賜及河南諸縣駕車所經者賜
高年爵恤孤寡老疾各有差孝悌廉義文武應求者具

以名聞癸丑求天下遺書秘閣所無有裨時用者加以厚賞乙卯曲赦梁州復民田租三歲丙辰詔遷洛之民死葬洛城不得還北于是代人南遷者悉為河南洛陽人戊午詔改長尺大斗依周禮制度班之天下秋八月幸西宮路見壞塚露棺駐輦埋之乙巳詔選天下勇士十五萬人為羽林武賁以充宿衛丁巳詔諸從兵從征被傷者皆聽還本金墉宮成甲子引羣臣歷宴殿堂九月六宮及文武盡遷洛陽丙戌行幸鄴丁亥詔諸墓舊

銘記見存昭然為時人所知者三公及位從公者去墓三十步尚書令僕九列十五步黃門五校十步各不聽墾殖壬辰遣黃門郎以太牢祭比干墓乙未車駕還宮冬十月甲辰曲赦相州賜高年爵恤孤老痼疾各有差丙辰車駕至自鄴辛酉詔州郡舉士壬戌詔諸州牧考屬官為等之科以聞將加親覽以定升降詔徐兗光南青荆洛六州嚴募戎備應須赴集十一月行幸委粟山議定圓丘甲申祀圓丘丙戌大赦十二月乙未朔引羣

臣光極堂宣下品令為大選之始辛酉以咸陽王禧為
長兼太尉復前安南王禎本爵甲子引見羣臣光極堂
班賜冠服是歲高麗鄧至吐谷渾等國各遣使朝貢
二十年春正月丁卯詔改姓元氏

資治通鑑載詔曰北人謂土為拓后為跋魏之先出
于黃帝以土德王故為拓跋氏夫土者黃中之色萬
物之元也宜改姓元氏又魏書氏族志載十九年詔
曰代人諸胃先無氏族功賢之胥混然未分故官達

者位極公卿功衰之親仍居猥任其穆陸賀劉樓于
稽尉八姓自太祖以降勲著當時者勿充猥官一同
四姓原出朔土舊為部落大人而皇始以來三世官
在給事已上及品登王公者為始若本非大人而皇
始以來職官三世尚書以上及品登王公而中間不
降官緒亦為姓請部落大人後而皇始以來官不及
前列有三世為中山監已上外為太守子都品登子
男者為族若本非大人而皇始以來三世有令已上

外為副將子都太守品登侯以上者亦為族皆具由
來擬姓族呈聞

壬辰封始平王勰為彭城王復封定襄王鸞為平陽王
二月辛丑幸華林聽訟于都亭壬寅詔自非金革皆聽
終三年喪丙午詔畿內七十已上暮春赴京師將行養
老禮庚戌幸華林聽訟于都亭癸丑詔介山之邑聽為
寒食自餘禁斷三月丙寅宴羣臣及國老庶老于華林
園詔國老黃耆已上假中山大夫郡守耆年以上假給

事中縣令庶老直假郡縣各賜鳩杖衣裳丁丑詔諸中正各舉其鄉人望年五十已上守素衙門者授以令長夏五月丙子詔敦勸農功令畿內嚴加課督惰業者申以楚撻力田者具以名聞丙戌初營方澤于河陰遣使以太牢祭漢光武及明章三帝陵又詔漢魏晉諸帝陵各禁方百步不得樵蘇踐藉丁亥祀方澤秋七月廢皇后馮氏戊寅帝以久旱咸秩羣神自癸未不食至于乙酉是夜澍雨太洽丁亥詔求直言極諫

冊府元龜載詔曰朕以炎陽興節輟膳三晨靈鑒誠
欵曲流雲液永休勿休寧敢僭怠將有賢人湛德高
士凝棲雖加銓採未能詔致其精訪幽谷與茲賢彥
直言極諫輔予不及

在京之囚悉命條奏八月壬辰朔幸華林園親錄囚徒
咸降本罪二等決遣之戊戌幸嵩高甲寅還宮丁巳南
安王禎薨幸華林園聽訟九月戊辰車駕閱武于小平
津癸酉還宮丁亥將遣洛水入穀帝親臨觀庚寅晦日

有蝕之冬十月戊戌以代遷之士皆為羽林武賁司州
之民十二夫調一吏為四年吏卒歲開番假以供公私
力役己酉曲赦京師十一月乙酉復封前汝陰王天賜
孫景和為汝陰王前京兆王太興為西河王十二月甲
子以西北州郡旱儉遣侍臣巡察開倉賑恤乙丑命開
池禁丙寅廢皇子恂為庶人戊辰置常平倉樂陵王思
譽知恒州刺史穆泰謀反不告削爵為庶人

二十一年春正月丙申立皇子恪為皇太子賜天下為

父後者爵一級己亥遣侍臣巡方省察問民疾苦黜陟
守宰乙巳北巡二月壬戌次于太原親見高年問所不
便乙丑詔并州士人年六十已上假以郡守癸酉車駕
至平城甲戌謁永固陵癸未行幸雲中庚寅還宮辛卯
謁金陵乙未南巡甲寅詔汾州賜高年爵各有差丙辰
次平陽使以太牢祭唐堯夏四月庚申幸龍門使以太
牢祭夏禹癸亥幸蒲坂使以太牢祭虞舜修堯舜夏禹
廟辛未幸長安壬申武興王楊集始來朝乙亥親見高

年問所疾苦丙子遣侍臣分省縣邑賑賜穀帛戊寅辛未央殿阿房宮遂幸昆明池癸未宋王劉昶薨丙戌使以太牢祭漢帝諸陵五月己丑車駕言旋泛渭入河庚寅詔雍州士人百年已上假華郡太守九十已上假荒郡八十已上假華縣七十已上假荒縣庶老以年各減一等七十已上賜爵三級其營船夫賜爵一級孤寡鰥貧各賜穀帛其孝友德義文武才幹悉仰貢舉壬辰使以太牢祭周文王于鄠周武王于鎬癸卯遣使祭華

岳六月庚申車駕至自長安壬戌詔冀定瀛相濟五州
發卒士二十萬將南討癸亥司空穆亮遜位秋七月甲
午立昭儀馮氏為皇后甲寅帝親為羣臣講喪服于清
徽堂八月丙辰詔中外嚴壬戌立皇子愉為京兆王悻
為清河王懷為廣平王戊辰講武于華林園庚辰車駕
南討九月丙申詔司州洛陽實年七十以上無子孫六
十以上無期貧不自存者給以衣食及不滿六十而有
廢痼之疾無大功親窮困無以自療者皆于別坊遣醫

救護給太醫師四人豫諸藥物療之辛丑帝留諸將攻
赭陽引師而南丁未車駕發南陽留太尉咸陽王禧前
將軍元英攻之乙酉車駕至新野冬十月丁巳四面進
攻不剋詔左右軍築長圍守之乙亥追廢貞皇后林氏
為庶人十一月甲午齊前軍將軍韓秀方等十五將來
降丁酉大破齊軍于沔北獲其將軍王伏保等于是人
皆復業九十以上假以郡守六十五以上假以縣令新
野民張睹柵萬餘家拒守不下十二月庚申破之俘斬

萬餘丁邠詔流徙之囚皆勿決遣登城之際令其先鋒
自効庚午車駕臨沔遂東還戊寅還新野己邠親行營壘
恤六軍以齊郡王子琛紹河間王若後是歲衛大高昌
國遣使朝貢

二十二年春正月癸未朔饗羣臣于新野行宮丁亥拔
新野降其太守劉思忌于宛

魏書曰戊子齊湖陽戍主蔡道福辛邠赭陽戍主成
公期壬辰舞陽戍主黃瑤起南鄉太守席譙相繼遁

庚戌幸南陽二月乙卯攻宛拔之南陽太守房伯玉

出降

庚午至自新野辛未詔以穰人首歸大順始終若一者
給復三十年標其所居曰歸義鄉次降者給復十五年
三月壬寅朔大破齊將崔慧景蕭衍軍于鄧城斬獲二
萬餘庚寅行幸樊城觀兵襄沔耀武而還曲赦二荆魯
陽辛丑行幸湖陽乙未次比陽戊申詔荊州諸郡民初
次降附復同穰縣辛亥行幸懸瓠夏四月庚午發州郡

兵二十萬期八月中旬集懸瓠趙郡王幹薨秋七月壬午詔后之私府捐半六宮嬪御五服男女恒恤恒供亦令減半在戍之親三分省一以供賞是月齊明帝殂八月辛亥皇太子自京師來朝九月己亥帝以禮不伐喪詔反旆丙午車駕發懸瓠冬十月己酉朔曲赦二豫州殊死已上復民田租一歲十一月辛巳幸鄴是歲高麗遣使朝貢

二十三年春正月戊寅朔朝饗羣臣于鄴先是帝不豫

至是有瘳庚辰羣臣上壽大饗于澄鸞殿壬午幸西門
豹祠遂歷漳水而還戊戌車駕至自鄴癸卯行飲至策
勲禮甲辰大赦太保齊郡王簡薨二月辛亥以長無太
尉咸陽王禧為太尉癸亥以中大將軍彭城王勰為司
徒復樂陵王思譽本封癸酉齊將陳顯達攻陷馬園戌
三月庚辰車駕南伐癸未次梁城丙戌帝不豫丁酉車
駕至馬園戌戌頻戰破之己亥收其戎資億計諸將追
奔漢水斬獲及赴水死者十八九庚子帝疾甚車駕北

次穀塘原甲辰詔賜皇后馮氏死詔司徒勰徵太子于
魯陽踐阼以北海王祥為司空王肅為尚書令廣陽王
嘉為左僕射尚書宋弁為吏部尚書與太尉咸陽王禧
右僕射任城王澄等六人輔政

魏書載甲辰詔曰我太祖丕丕之業與四象齊茂累
聖重明屬厯寡昧兢兢業業思纂乃聖遺蹤遷都嵩
極定鼎河漚庶南蕩既吳復禮萬國以仰光七廟俯
濟蒼生困窮早減不永乃志公卿其善毗繼子隆我

魏室不亦善歟

夏四月丙午朔帝崩于穀塘原之行宮時年三十三秘諱至魯陽發喪還京師上謚曰孝文皇帝廟曰高祖五月丙申葬長陵

宋楊萬里揮塵云太祖乾德四年詔置守陵兩戶三年一祭以太牢又按錄云魏孝文葬永陵在陝西富平縣大誤資治通鑑註曰長陵在涇西涇西河南地讀後文明皇后傳自明若富平永陵乃西魏文帝陵

也

帝幼有至性年四歲時獻文患癰帝親自吮膿五歲受禪悲泣不自勝獻文問其故對曰代親之感內切于心獻文甚嘆異之文明太后以帝聰聖後或不利馮氏將謀廢帝及于寒月單衣閉室絕食三朝召咸陽王禧將立之元丕穆泰李冲固諫乃止帝初不有憾惟深德丕等撫念諸弟始終曾無纖介惇睦九族禮敬俱深雖于大臣持法不縱然性寬慈進食者曾以熱羹覆帝手又

曾于食中得蟲穢物並笑而怒之官者先有譖帝于太后太后杖帝數十帝默受不自申明太后崩後亦不介意聽覽政事從善如流

冊府元龜載帝謂尚書等官曰臣稽古典章樹茲百職然尚書樞機是司豈惟總括百揆朕之得失實在於斯今年垂二周未嘗言朕一失亦未嘗進一賢而退一不肖此二事罪之大者魏書劉昶傳載帝言曰國家本來有一事可嘆臣下不肯公言得失是也今

卿等宜各盡其心為君患不能納諫為臣患不能盡忠

哀矜百姓

魏書刑罰志曰故事皆裸斬高祖以去衣裸體男女媠見非所謂齊以法而示以禮又以侯職千數重罪受求不列細過吹毛而舉皆罷之每有奏讞悉從降恕全命徒邊歲以千計京師決死獄歲竟不過五六

州鎮亦減

欽定四庫全書

恒思所以濟益天地五郊宗廟二分之禮常必躬親不以寒暑為倦尚書奏案多自尋生百官大小無不留心務于周洽每言凡為人君患于不均不能推誠遇物苟能均誠胡越之人皆可親如兄弟嘗從容謂史官曰直書時事無諱國家人君威福自己始復不書將何所懼南北征巡有司奏請修道帝曰粗修橋梁通輿馬便止不須去草剗令平也凡所修造不得已而為之不為不急之事重損人力巡幸淮南如在內地軍事須伐人樹

者必留絹酬其直苗稼無所傷踐諸有禁忌禳厭之方
非典籍所載者一皆除罷雅好讀書手不釋卷五經之
義覽之便講學不師授採其精奧史傳百家無不該涉
善談莊老尤精釋義才藻富膽好為文章詩賦銘頌任
興而作有大文章馬上口授及其成也不改一字自太
和十年已後詔冊皆帝文也自餘文章百有餘篇

魏書曰高祖留意文史文章百篇冠絕終古 隋書

經籍曰後魏孝文頗效屬辭未能變俗例皆淳古

愚謂文字中能兼淳古正人所難及恐孝文猶未臻此耳史官何言之易哉

愛竒好士情饑渴待納朝賢隨下輕重常寄以布素之意悠然玄邁不以世武嬰心又少善射僕有膂力年十餘能以指彈碎羊髀骨射禽獸莫不隨行所至而斃之至十五便不復殺生射獵之事悉止性儉素常服澣濯之衣鞞勒鐵木而已帝之雅志皆此類也

魏書天象志曰帝方修禮儀正喪服經人倫之化竟

未就而崩少君嗣立事復寢縉紳先生咸哀慟之
論曰有魏始基代朔廓平南夏開土經世咸以威武為
業文教之事所未遑也孝文纂承洪緒早著敷聖之風
時以文明攝事優游恭己玄覽獨得著自不言神契所
標固已符于冥化及躬總大政一日萬幾十許年間曾
不暇給殊途同歸百慮一致夫生靈所難行人倫之高
迹雖尊居黃屋盡蹈之矣若乃欽明稽古協御天人帝
王制作朝野軌度斟酌用舍煥乎其有文章海內黔黎

咸受耳目之賜加以雄才大畧愛竒好士視下如傷役已利物亦無得而稱之其經緯天地豈虛諡哉

魏書崔僧淵傳曰僧淵自宋入國累官征東大將軍蕭驚遣其族兄惠景遺書說以入國之屈規今改圖僧淵復書曰主上為人無幽不炤無細不存仁則無遠不及博則無典不究殫三墳之微盡九丘之極文章錯綜煥然蔚炳若夫子之墻矣遂開獨悟之門尋先王之迹焉惟新中壤之宅三光起重輝之炤庶物

蒙再造之恩始分氏定族科甲乙之科班官命爵清九
流之貫禮俗之叙燦然復興河洛之間重隆周道巷
歌里頌朝熙門穆文士競謀于廟堂武夫效勇于疆
場若論事勢此其實矣計彼主指齊篡殺人鬼同知
兄投心逆即千載何名見機而作其在茲乎賈不及
時雖貴不用若不早圖將枉連城讀僧淵此傳可括
孝文美德故錄于後

或問孝文王通曰可與興化矣中國之道不替孝文

力也又曰太和之政近雅矣

南北史合注卷八十九